



Aqqalu C. Jerimiassen
Atassut

UPA 2024/77 - 1
18. april 2024

Ilisimatusarfimmi Ilinniartitsisunut, Perorsaasunut aammalu Isumaginninnermut Siunnersortinut ataatsimut kandidatinnngorniarfissamik Naalakkersuisut pilersitseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Najaaraq Møller, Siumut)

Assortorneqarsinnaanngilaq ilinniagaqarnissaq pingaaruteqartoq. Peroriartorpugummi politikkerit tamanna uteqattaartuaraat. Ullumikkumut sulii. Siunnersuuteqartullu siunertaa aamma Atassummiit taperserusupparput qaffasissumik ilinniakkat amerliartornissaannut tunngatillugu.

Ajoraluartumilli tusartarparput angajoqqaat ilaasa meeqqatik ilinniagaqarnissaannik killilersortaraat. Meeqqallu atuarianni meeqqat inuusuttuaqqallu akornanni ajoraluartumik mutiuvoq ilinniagaqarnissamik malinnaanissamulluunniit soqutigisaqannginnissaq.

Taamaammallu angajoqqaatut pisussaaffik annertunerpaavoq kaammattuissalluta. Ilinniagallimmi amerlisassagutsigit, qaffasissumillu ilinniagallit amerlisassagutsigit, suliffeqarfinnilu nammineeirluta kalaallit atorfiit tamakkerniassagutsigit immitsinnut akisussaaffilertariaqarpugut. Tamannalu angajoqqaaniit aallartittariaqarpoq.

Oqartarnerattuummi piumassuseq nukiuppat nunarput qimallugu ilinniagaqarsinnaaneq pitsaaqutilerujussuugaluarpoq, inooriaatsit allat misilillugit, avatangiisit nutaat inuuffigalugit, silarsuarlu allisillugu. Tamakkumi tamarmik perorsaataallutillu ineriartortitseqataasarmata. Immitsinummi aallunniarsarinikkut immitsinnut ilummut saalluta mattunniarsarisariaqanngilagut.

Qaffasissumillu ilinniarusuttut amerlisassagutsigit pingaarutilerujussuuvoq inuiaqatigiinni ilinniagaqarneq akilersinnaasutut inissisimatinnissaa. Ingerlalluartunummi sinngajuartilluta, akileraarullu taamak qaffasitsigitillugu, isertitakinnerpaanuinaq oqilisaassinissaannaq ukkatariuartillugu, naligiinniarnep aqqani atugarissaarnerit kivitsinerunissaannaanik oqaluttoqartillugu, ila qaffasissumik ilinniarsimasut amerliartorluarnissaannut ila aqut takinaassavarput.

Qaffassarusullutik ingerlariaqqikkusuttut soqutiginnippata, naammattutullu nalilerneqarpata akissaqartikkutsigulu Atassummiit siunnersuut ilalerusupparput. Kultureqarnermut, Ilinniartitaanermut, Ilisimatusarnermut, Ilageeqarnermullu ataatsimiititaliamut innersuupparput.